



## **JSMP lansa relatóriu anuál 2023 tolu iha selebrasaun aniversáriu JSMP ba dala XXIII**

Selebrasaun aniversáriu JSMP ba dala XXIII (23) monu iha 28 Abril 2024 maibé JSMP selebra sedu iha 26 Abril no iha tempu hanesan lansa mós relatóriu anual 2023 tolu mak hanesan Relatóriu Observasaun Jerál Setór Justisa (OJS), Relatóriu Observasaun Parlamentár (POP) no Relatóriu Institusionál.

“JSMP prodús relatóriu anual tolu ne’e nu’udar toman ida iha JSMP nia selebrasaun aniversáriu kada tinan. Tanba ne’e, agradese ba doador sira ne’ebé apoiu ona atividade sira JSMP nian iha tinan 2023. Agradese mós ba iha Tribunál, Parlamentu Nasionál, Governu, Prezidénsia Repúblika no mós entidade sira hotu ne’ebé apoiu no kolabora ona ho JSMP durante tinan ida nian laran. JSMP espera katak apoiu no kolaborasaun ne’e sei metin liután iha futuru,” dehan Sra. Ana Paula Marçal, Diretora Ezekutiva JSMP.

Relatóriu Observasaun Jerál Setór Justisa fó sai kona-ba progresu no dezafiu sira iha setór justisa nian, elaborasaun situasaun sira violénsia bazeia ba jéneru, relata JSMP nia atividade assisténsia legál ba vítima fetu no labarik, dadus observasaun JSMP nian iha tribunál judisiál primeira instánsia sira no Tribunál Rekursu.

Relatóriu Observasaun Parlamentár fó sai kona-ba funcionamentu Parlamentu Nasionál liga ho produtividade parlamentu iha lejislasaun nian no halo analiza kona-ba artigu sira iha Konstitusaun RDTL ne’ebé prezisa halo revizaun, esbosu lei indultu no artigu 1475 Kodigu Sivil kona-ba rekoñesimentu kazamentu ne’ebé JSMP konsidera provizaun ne’e halo diskriminasaun ba relijiaun sira non katóliku.

Relatóriu rua ne’e konklui ho rekomendasaun importante no relevante balun ne’ebé dirije direktamente ba órgaun no instituisaun competente sira atu bele tau iha konsiderasaun. JSMP hein katak rekomendasaun importante hirak ne’e bele hetan konsiderasaun hodi hadi’ak funcionamentu sistema justisa formál no lejislativu iha agora no ba futuru. Relatóriu sira ne’e bele asesu iha JSMP nia website <https://jsmp.tl/>

Enkuantu Relatóriu Institusionál fó sai kona-ba atividade sira JSMP nian durante tinan 2023 inklui kooperasaun institusionál tantu nasional no internasionál. Relatóriu ne’e mós deskreve apoiu finansimentu ne’ebé JSMP simu hosi doador sira nu’udar justifikasaun no forma akuntabilidade ba públiku.

Lansamentu ne’e partisipa hosi Dignísimu Prokurador Jerál Repúblika, Dr. Alfonso Lopez, Exelénsia Sekretaria Estadu Igualdade (SEI) em ezersísio, atual Sekretária Estadu Komunikasaun Sosiál, Sr. Expedito Dias Ximenes,

Exelénsia Provedór Direitus Umanu no Justisa, Sr. Virgilio da Silva Guterres (Lamukan), Prokuradór Adjuntu na'in tolu, Diretór Jerál SEI, Juis Tribunál Judisiál Primeira Instánsia Dili, Defensór Públiku, Representante Gabinete Apoiu Sosiedade Sivil, representante INDDICA, IP, advogado privadu, representante embaixadór Nova Zelandia, Representante embaixadór Australia, doador sira hanesan The Asia Foundation (TAF Nabilan no PASK), UNDP/Koica, representante USAID, Counterpart Internasionál no Hivos. Alende ne'e, partisipa mós hosi eis diretór JSMP, parseiru serbisu sosiedade sivil hotu, representante KLATU (Komisaun Luta Anti Tráfiku Umanu), dosente UNITAL, representante UNPAZ no UNTL, inklui média sira.

Partisipante sira ne'ebé partisipa iha JSMP ninia aniversáriu no lansamentu relatório ne'e hamutuk neen nolu resin neen (66).

Atu hetan informasaun kompletu, favór kontaktu:

Ana Paula Marçal  
Diretora Ezekutiva JSMP  
Diresaun e-mail: [ana@jsmp.tl](mailto:ana@jsmp.tl)  
Telefone: (+670) 33238883 | 77040735  
Website: <https://jsmp.tl>  
[info@jsmp.tl](mailto:info@jsmp.tl)